

梧溪集

三

王原吉梧溪集

第三卷

梧溪集卷第三

江陰王 逢 原吉

菜亭四詠有引

菜亭者先君庫使之所作也賜進士及第內御史篤列圖敬夫書扁江陰儒學教授閻中邢泰亨翁爲記先君年六十輒不仕日課童治圃爲徑必直藝蔬必方嘗指謂逢曰小子識之此類吾性也先君沒之二年逢忝部使者薦又明年江南務殷由是無仕進意而以先志是守并賦四詩揭亭間或尋聲于琴或倚歌于缶退然自樂殆相遺於人世也

其黃獨曰猗歟黃獨質土德王惟德惟質是以有葉有實凱風至矣青青始蔓雨雪既零爛其几按富貴無常人或汝忘予敢食言長鏡在傍長鏡在傍貧賤之光匪貧賤之光隱淪之慶

梧溪集三

其蕨曰彼美者蕨岐蹄而茁齊魯之人謂菜之鱉雷風發春競擷于山父獨不食神往來于山間慨昔君子夷齊園綺壽考以終猶愈飢死飢弗忍師考終是期衣薜帶蘿聊從而嬉兮

其黃精曰葉之菁菁如竹葉之青厥根孔美食之可以長生朝陽之燠時雨之沃君子有之以脩旨蓄吳之野土力貧培隱德樂彌臻孰謂芝也不如薇也

其蓴曰蓴之潔貞蒞藻其朋蓴之芳烈蘋蘩其列曰絲曰塊可羹可菹君子素貧念不到鱸五侯之鯖太官之羊鼎折餽覆溪毛無傷登我邊矣薦我先矣載被我弦永弗諼矣

黃河一首贈胡璉師貢

黃河濁流其源自天四方交亂莫知誰愆靡亂弗寧靡濁

士礼成



弗清小人之亨君子之貞君子之貞惟道是友小人之亨
乃罪之首雖曰無家有琴有書朝誦暮弦何樂之如鸚黃
其羽集于嘉林願言似之永懷德音

小山招隱辭有引

小山招隱者雲間孫稷長慶別業之名義則左太冲反
招隱也長慶言行謹飭嘗爲文學官兵興遂不復仕讀
書賣樂于橫雲山之支隴有壁峭立泉涓然出壁下有
石空中擊之有聲日歌樂于是蓋期與明哲士終老焉

辭曰

橫雲分兮一股壁鐵立兮石奏鼓桂膠枝兮荃有芳吟玄
狔兮白鶴舞君胡爲兮塵土弦我琴兮歌我招泉冽寒兮
天窅寥月高露灑兮車音遠迢心悵惘兮不成消搖君之
盟兮孔昭言採兮可道言釣兮維鱸渭濱商顏兮其道匪
殊治亂使然兮出處異趨載弦載歌兮茲山之矧君之來
兮毋遲其驅

故內御史捏古氏篤公挽詞有序

公捏古氏名篤列曷字敬夫燕山人國初大父長信州
永豐縣因家焉父卜里也禿思從 文皇帝潛邸官至
靖江路總管素無子至是媵產公有異年甫冠及第
上親覽策曰必世臣佳子弟也何以知吾家事若是其
詳耶授集賢脩撰中丞馬公伯庸妻以妹累遷南臺御
史按治湖廣江浙咸有聲威順王素不法漁奪山澤之
利尤甚民苦之出數百里告漁奪狀公一無所貸還之
民論奏王罪削降爵土王憂悸不知所爲會赦免福建
廉訪司凡御史至堂幄地衣盛設金繡公命撤去及視
事莫不震懾曰慎毋犯狀元御史比還內御史某挾私

劾某官公以失糾察去職尋三臺辨明除湖廣省副理
問不赴遷生母潘氏縣君葬北上拜內御史以疽卒壽
三十七公短小凝重眉目秀朗官居巷處言行一致愛
豫章山水留寓頗久歲一至豐爲女兄壽女兄誓不嫁
悉以已租贍之異母弟早孤長以廕讓族弟帖哥亦依
公學登乙酉進士第朔州同知子某

篤公產南州胞有紫白異襁襦未勝觴生母痛先逝操危
慮也深十九面廷試詞旨極懇切奏讀驚侍衛文皇至
親覽天眷邁恩例瓊林宴狀元銀屏會佳壻花交歸香署
草偃迂絲轡要職尋屢遷中朝適無事南臺按三省文物
紀綱地御史象執法獨見公不愧先時威順王畋漁盡民
利首縱魚鳥樂復奪士馬氣閩部俯交廣蠙犀蔭榕荔從
容撤堂幄蜚蜚海肅秋霽譽重謗由興才大衆所忌繙然遂
孝思遷葬返北冀女兄老閨閤誓不通采幣歲展骨肉歡
均財及諸季最幼陟龍榜家學益名世顧予駑鈍姿激越
千里志還鄉理書劍承拜內驄使將依東道光竟灑西州
淚脩文得顏回前席失賈誼山房懸蘿月公嘗爲予書神
采形夢寐盛蹟在董狐茲焉述交義

故東流尹陳公挽詞有序

公諱文杰字漢卿號默齋毗陵人也父業醫母張憐其
好學每質簪珥奉師會宜興鉅室蔣竹徑病公侍父往
就留其塾卒業久之客有寓公過蔣一見納爲友寓公
赴浙憲使遂薦授慶元儒學正至則浙東帥重之俾二
子從二子挾貴胄無弟子禮又群蒼頭臂鷹鷄日躡躡
無度公麾蒼頭去弗聽乃朴教二子曰吾授堂帖一通
班官耳義猶受天子命天子有聖旨諸王駙馬不得擾

學校汝敢是乎因奪一大鷹縱之蒼頭走白其帥帥怒
喚公衆爲公懼止之公曰吾有聖旨在竟往帥詰曰縱
鷹有之乎公曰鷹不縱帥有罪具言云云帥竦立曰是
愛我也遣蒼頭出謝仍護公歸既辟爲其掾一郡大驚
滿考除本學教授再辟掾淮東陞兩浙運司知事丁母
艱服闋改江陰知事三載擢東流尹推贈父宜興判官
母宜人即謝病歸逾年卒壽六十九先是公長郡幕里
人殷數請托先君拒絕之殷銜恨誣行賂告分憲屬公
逮繫公復憲官曰典史王某者清謹人也杰交其子逢
亦未始識一面萬萬無是事惟體察之憲官躡公言獨
不問後逢見公于家無一言及之其平生行義率類此
公負詩名監丞陳公旅以兄弟禮寢親善嘗誌其母宜
人墓子在有文學遭亂憂悸死孫一

東流家本醫少貧困閭伍賣藥粗給身力學忍刺股祖塋
良苦志黃憲早稱許參朮收狄籠芝蘭羞謝墅繡衣驄馬
郎遂有茂才舉尋典四明教弦誦喧兩廡元帥勳舊臣遣
兒授訓詰其奴臂鷹鷄躡躡聖宮宇毅然掣錦條麾去莫
敢侮同舍爲公懼公且白大府帥歎禮遇加擢掾器三語
再遷東淮閩參贊妙材諳郗超幙兩登單父琴一鼓先塋
罷焚黃長嘯即解組桑榆晚留景奄忽悴風雨送喪阻范
式能詩失阮瑀憶昔忘年交瓦缶視鍾呂虞揭歐黃輩恨
不與披覩閒話良天時盆縲罄餘緒况於魯連義歷歷在
肺腑遺孤喪亂中揆分合予撫嗚呼同漂零清秋益愁佇

故空谷俞先生挽詞有序

先生諱遠字之近號空谷江陰鳳歌鄉人也其先儒起
家至先生貧隱居教授能行古道毗陵孫岵以先世舊

依先生待如新知卒殯焉頃年疫備奴病乞歸先生曰
慎毋疑疫氣相染其善調護踰旬死時兵興山林盡赭
人死多委之壑或以是請先生曰生盡其力死棄之溝
中不義也單出爲棺定歲暮春里萌昇木偶神遨井落
間至先生門適所昇重而止昇夫告家姥曰神靈報施
影響捷宜急祭燎旗下否則殃及矣姥笑曰木偶何能
爲主人歸吾家爨下物耳衆愕眙去族姪裕親歿有佛
者以佛事爲解裕毅然曰吾諸父嘗謂形神既離地獄
何有今乃自誣親有罪不孝孰甚佛者慙而退其善行
及人率類此先生骨貌清卓類有道者長於古文尤嗜
詩亂中吟詠不輟嘗自叙詩曰蟲之翦翦鳥之嚶嚶機
動籟鳴豈得已而不得已乎不得已乎耳于以見其出乎
性也壽七十二子樵孫庠序

空谷俞先生言行慥慥爾襄陽一耆舊東魯古君子奕葉
蘭桂芳晚見長松倚野鶴夕警露天雞晴影水神清凝高
寒眼碧照烏几州閭薰善良土俗變淳美削跡門徒僧罷
迎藁祠鬼貧交有孫岵推食養沒齒義聲及畊奴亦免溝
壑委遭亂接浙行帶索並藿葦兒樵性至孝承順若居里
先生但微吟落句益竒詭玄洲摘芝秀翠嶽決石髓咸瞻
星應庚忽夢歲在己枯羽鏃礪道蘊勿甚提耳忘年感孔
融赴弔愧徐穉霜晨高鴻邁獨擢五湖淚爲歌雙梧歌先生
作此嘗挽先林哀朔風起
君後附

客行天下半波流日滔滔卓然王幙長獨詣見所操西
風吹黃鵠瞥眼雲中翱無彼升天翼欲飛詎能高讀律
三十年弗離州縣勞歸休青山郭綠溪置屋牢種瓜以
爲業不復求其曹饌甘盤有魚飲旨尊有醪兒賢曲奉

養未暮樂陶陶柰何百年期懽忻變號眺望見雙梧樹
我每涕沾袍梧樹奚足悲迴躅於焉韜

故贈江西省左丞謚文節汪公挽詞 有序

公諱澤民字叔志號堪老真逸以春秋登戊午進士第
累官致仕禮部尚書歸宣城淮人闖境公倡鄉子弟保
里閉會城陷遂遇害越七年詔贈江西省左丞謚文節
逢見大夫士每稱公性廉孝尤慎許可嘗推官平江任
法恕允獄多平反垂代題春帖云及瓜當此日行李似
來時迨今爲實錄再推信州太夫人道病公屣履扶筴
輿以行比至摠管秦從龍謁謂曰今晚可就職脫太夫
人不諱吾能率僚屬賻祿之不然喪誰與舉公曰匿親
病而上官是遺親也遺親不孝覬官斂而私親是貨官
也貨官不忠不敢惟命太守苟推仁湯藥是饋則母氏

梧溪集卷三

六

更生是望某拜德侈矣秦覲而退太夫人卒服闋起知
兗州文教大行僦廬問學者數十百人流民過其治勸
義賑之能聞召待制翰林與脩三史當時大臣有傳旨
奉金幣鞍馬求撰其勲功之碑者卒辭既大臣罪謫傾
朝服公先知陞國子司業集賢直學士尋告老云逢於
公無半面雅荷不鄙夷嘗賜詩序竊愧蔑以報稱也姑
述其槩系以挽詞

嵇康貴神交梁鴻重懷賢古來知己遇詎在相摩肩仰惟
文節公清白忠孝全天禧光祿後五世衣冠綿讀書敬亭
裏射策香桮前半刺以鳳栖一麾遂鵬騫宮壺酒賜縹太
乙杖吹煙鬼泣修史筆門泊問字船疏廣忽引去傾都望
如仙澆澆宛溪水酌酌溪上田鰕菜薦嘉豆鶯花照堂筵
至正乙未間星狗光孛然首倡扞鄉井准人竟扼咽侯伯

竄草間丁壯死墓邊執公義不屈子姪尚控券詈言今顏
杲勁氣昔鄭畋臣素奏 我皇褒贈著史編憶昔太平日
高名南斗懸忘我襪線才贈我瓊琚篇陋鼎飾金鉉爨桐
被朱弦鼠朴免售鄭駿骨期市燕空谷一蛾眉衣袖馥蘭
荃思君限楚水日夕魚風顛青燈耿漆室短褐望祀天老
成嗟已矣客淚雙迸泉再歌宋玉些黃鵠高迴旋

寄丘都事

曩僑西湖西遂識東家丘平生五經笥聲價千金裘借地
營茅堂秋隘不容輒文犀水蒼珮無時顧巖幽畦蔬何青
青一飯常苦留推論當世事過許僮儻別經喪亂年廬
墓兼百憂上馬即擊賊恐貽孝子羞伏承從大軍烽火空
三州生還揔務面望拜多白頭荒原露草根舉鞭枯骨收
捷聞詔東討朱夏行清秋黃池正觀兵移戍浙上流觸輪

梧溪集三

七

避螳螂撼樹憐蜉蝣祭遵日雅歌道濟夜唱籌所在成相
業正自出軍謀月落江蒼莽熒惑光射牛白蛇橋長淮睥
睨龍驤舟君懷靖四海且復掛吳鉤機務信有暇緘詩寄
滄洲

寄李守道 有後引

西湖有奇士少負不羈才酒外嗜八分席地畫青苔妻憂
竝儲罄薺甕手自開煮雪白石窩捫腹視三台父安素貧
賤惟恐富貴來風塵瀕東南衣冠就衰隤慟哭岳王墓北
走燕昭臺平章造次見符檄隨所裁徵兵復三州疾如破
山雷無辜起塗炭寸管萬牛回釋褐慕董生玉帛讓輿僮
丈夫誓行志竊位良可哀時予客左丞遠愧鄒與枚禦寇
書飛上翩然返蒿萊籟雲仰驂騶失道甘駑駘天風薜花
落離思浩江淮願言輟予想曠野多賢材

守道諱介石性爽邁能書詩困約無所遇徽寇陷杭以
書見省臣命草符檄遂器重之授松江府提控按牘從
守鎮江後鎮江失守以不屈辱而死煮雪齏麤甕白石窩
皆其舊居室名

三貞篇寄納麟哈刺參政幕下僚友

梧西女陳氏顏色絕勝玉阿耶燈窓下古傳常暗讀義須
嫁官人麻泉心所足兵麾忽東指烽火蔓平陸魚鱉遭顛
連雞狗同迫逐狹狷哆其口反噬机上肉母子泣相誓寧
死不汝辱春輝黯門楣寒日照鬼錄皇天實鑒臨家廟爲
慘肅陳氏母曹宋直講髮婦聽婦吳人亦在難自判受命獨
臂血濺賊衽賊歎爲斂縮差差白刃間偉節驚耳目荒野
雲雪暮緬想會深竹水流風悲鳴星迸萬羽鏃回首陷沒
地何限委溝瀆大參行當來卹典具簡牘前湖百世祀謂

梧溪集三

八

代時烈女何氏明妝儼車服從以雙素鸞配享疇敢黷孤蓬任漂
轉餘齒寄草木倡茲三貞篇庶用矯浮俗

奉陪黑左丞觀射石幢門外

前徒驅干旄後乘咽短簫君侯美裘帶白馬金轡搖道出
石幢門春始轉柳條公堂俯平曠武士集英翹離立控角
弓百步建錦幟眼空熊渠虎臂落李廣鵬登降禮數新賞
罰號令饒忘歸迸寒星決拾迎鮮颯失鵠固自耻破的奚
庸驕先王用觀德今此樂賓僚龍勺映彝尊玉帳臨青霄
客卿忝末至屬賦軍中謠川澤魚上冰野煙尚蕭蕭於焉
詢幽隱聊以示逍遙民情自茲得無復慮三苗

送楊子明知事從觀孫元帥分制沿江州郡

寒日動大江鞍馬散滄洲漚光滅沒外迴見冰梁浮壯士
無人色旗羽風颺颺揚君志弧矢笑被黑貂裘祭輶千仞

岡掉鞅萬斛舟先聲掠淮甸遙制三邊州元帥統將權言
責在軍謀一言關興喪跬步分陽秋天地屬閉塞波伏蛟
龍湫孤煙起天際薄暮青轉幽百里靜雞犬豈但窮兵由
雪貿薺麥生猶聞鑄戈矛頻年竭土壤經時委川溝行其
所無事凋瘵或少瘳耀德不觀兵當今第一籌君昔甚惻
隱曲宥千俘囚歸裝輕於葉廉價重琳球敝邑蒙荐臨多
暇獲讌游鳳凰巢阿閣黃鵠宜遠投菖竹霜實繁知止疇
與侔蘆根短刺水鷺斯空啾啾願予麋鹿姿蓬蒿翳林丘
行藏任本性道義期加脩

雨坐梧溪精舍

青梧陰四合長夏含秋清及茲積雨晦甄瓠水衣生別巷
鶯聲歇香煙鵲尾橫難言溪上思千載一時并

夜坐

落日秋氣昏回溪夜涼薄幽花散露榭孤螢墮風閣冲襟
謝煩歎廣簟生離索躑躅履望明河南天正飛鵲

繆孝子有引

孝子名倫字叔彛年甫冠博識能文本東平人侍父宦
游於杭至正十六年淮兵執其父將殺之倫哀號乞免
弗聽傾家貲贖父命又弗聽乃自縛請以身代於是父
見釋而殺倫前鄉貢進士樊浚言之予悲倫之志行不
大顯也爲作琴操一首期聲傳無窮焉

父存兒死兮兒可再得父死兒存兮兒其天殛聽代父死
兮全兒職於乎人心不泯兮亂有底極

葵蘭贈孫孝子彬有引

彬值揚州兵變負母而逃兒女散失頌者美其有慈烏
之義而未及舐犢之愛焉故予賦葵蘭一章

葵衛其根日月燭之蘭茁其芽雨露沃之兵變倉卒兮負
親而逃山川險阻兮無乃親勞上天孔仁兮命也兒遭

義僧行

世降道淪喪盛事罕見之我歌義僧行蘄取國士知僧臻
生夏浦俗號徐大師勇敢重意氣赤手可獵麋張忠郭解
流任俠不計貲臻願出門下效死誓不移盜尋冠馬洲魚
肉乎蒸黎元戎堅營壁大姓深溝池壯哉張父子分率脫
項兒父擒子死難家不得斂屍臻聞切齒恨恨死不同時
夜即操斧刀奮身斫藩籬徑入牛宮內斧斷張繫維手殺
盜六人力挽間道歸妻孥拜堂下金幣謝所私上公賜巾
裳欲以好爵縻幡然掉臂辭還山弄摩尼方今國步艱中
外罹瘡痍銅虎盡懸綬鐵馬誰搴旗嗟爾匹夫臻足張三
軍威何不食君祿爲君靖淮夷收名魯仲連千載爲等期

吾溪集三

十

天秋黃葉脫日暮玄雲馳歌詩節鼓吹用壯吾熊羆

壯士歌

明月皎皎白玉盤大星燁燁黃金丸壯士解甲投馬鞍疾
藜草深衣夜寒劍頭飲血何時乾

義兵謠

春虹白冬草碧八月黃河火雲赤將衣我衣吏食我食望
塵走馬當殺賊

寒機女辭

鴛鴦機滿東西舍雪璽縹緗來日相射世俗競染紅藍花妾
心鍾愛金絲柘君王錦繡焚殿前天孫鳳梭蛛網懸織成
雲霧製龍袞萬一熏香分御筵

朱夫人有序

夫人諱元琇江陰知事朱道存之妻都漕萬戶費雄之

女也至正十六年江陰亂夫人依其父居松江之上海
未幾上海縣陷苗軍復縣大掠夫人驚遽出卧内時苗
手刃以入將犯之夫人怒叱曰吾貴家女貴家婦夫君
見勤王汝本官兵奚為犯我投釵珥于地苗攫之去既
苗皆至索貲無有遂驅迫就道夫人揆不免乃攀堂楹
厲聲曰吾義不辱苗狗忍辱我耶比遇害爪入楹木血
沁于指哀哉始先君庫使解官歸里逢適主于其家每
與盛宴輒缺然若不甘者知事言其故於夫人它日復
宴夫人親為別具饌命子文博文禮昇示逢曰此奉尊
翁自是以為常明年逢過其地嗟夫人之生也柔惠足
以德於人歿也貞烈足以表於世謹為辭以弔之辭曰
青賞花白浦水黃雲日黯慘風悲涼傳轡西向三酌觴旂
旌葆幢來混茫若有人兮凜如霜星流電馳惟可望微言

梧溪集三

十一

夙習大洞章功成拔宅居帝鄉鵲河蟾窟肆翱翔笑援北
斗挹酒漿帝曰欽哉無太康下為叔世扶綱常進規退矩
禮自防釵荆裙布今孟光尊姑養之植德堂朱氏名階珠
樹聯瑤芳明璫蒼珮森琳琅槌鐘考鼓樂未央楚氛遮天
耀天狼飄然歸寧父母傷正坐漆室憂葵傷官兵寇我加
劍鏗昊天倚杵海變桑身有賤血無回腸烈婦殉節死固
當名與黃浦流俱長稽首載拜淚兩滂輶馬直上駮鸞凰

張武略有序

侯諱珎字元諒堂邑人以廕受武略將軍穎州翼萬戶
鎮杭至正十二年冬徽寇陷常侯引兵伏橫林偵得其
狀連敗之乘勝深入常悉平明年春移戍婁江海漕罷
警夏六月江陰儉民江年二人作耗太尉納麟檄侯討
之父老上謁必親慰曰某義不與賊俱存須蜂蠆歸

郊鄙輸賦流移歸業以謝父老苟不幸先士卒死亦無憾也父老感泣未幾俘若干人射死其手旗者秋八月浙東元帥野先合侯進屯胡村賊縱火迫胡村各分地出戰賊蔑以當侯潰去輒勒兵助野時野與裨校鄭溥賢死矣侯機發弩曠復大敗之以返失二部將侯奮激曰將陷而獨全耻急追之冒圍以入江中三矢牟被創甚其黨度擒江牟將魚肉其類因并力來抗侯矢盡馬蹶精銳傷者過半乃拔所佩刀蹂殺數十百人以死先是浙省叅政買木丁分制常侯嘗直言忤之故其臨敵也按不之援以至不利云

張武略馬中驃鷲中鷄神清氣完志落落決昔萬里空沙漠紅巾據有南蘭陵無人先執螯弧登角弓朝分雲漢月血刃暮洗官壕冰黃金鍊甲鎮江傲食簞漿壺駢父媪刁

斗巖城令密傳菜果湯村跡如掃睦州方臘絕饑道素服威名罷侵擾陋邦寇劫誰使然令我諸君師盡老孟勞寶刀龜甲文縑然佩之星入氛庸賁千百濟墟猛禽獮草薙收竒勛浙東元帥亦不群羅闈狗附聯陣雲兩軍鼓行屋瓦墜殺聲直上蒼天聞牙張距趯開復合左啓右祛烟至接勢如驚颿振槁葉冒圍蹂賊膽驚賀蘭陰拱僅自守檀公上計無乃走王琳遺愛壽陽間袁崧殉名扈瀆口妖星黨現秋日微英雄命薄將安歸連營陷敵泯功業別部抱憤無晶輝殘兵故吏望鄉哭偷生可誅死可錄我招其魂歌楚曲高寒吹下雙鴻鵠

盡室歎讀東魏史高驩語鮮卑一事有感

女為驅子為奴父畊母織絹稅輸坐君高堂我向隅奉君細饌我食鹿憶昨上官我前趨及今敗績我後徒君不見

殺君之餘春風紫燕停紫衢錦纏繡絡舞鷓鴣胡琴秦箏
間吳飲酒面花影紅扶踈君樂滿座容顏舒再拜壽君明
月珠願君世世金虎符縣籍無我甘樵漁

君家柳

君家柳萬株一色鶯黃酒龍鱗波暖裊翠煙飛花直渡江
南天倉庚立曉燕穿午薄暮啄木聲丁然腹中樹蝕皮齧
馬舊陰半減金城下長條短條屬行人猶有持斤睨之者
秋來大地落葉鳴心憶陽春淚如瀉

趙氏雙珠辭

遊鯉山石高孱顏遊鯉溪水清洄灣中有莪莪青結髮望
如春雲不可攀壬辰中冬冠蜂起乳臭將軍先披靡民人
顛連社稷圯我固當爲貞白鬼後來謂年小妹復被驅亦
葵魚腹全其軀山高水清幾千載虹月夜貫雙驪珠夜深

鮫宮屏機杼風吹草寒觸體語何由生長江沱間及見王
睢鼓衣羽願回堯天行化日女子有家男有室地下甘心
燈似漆

夜何長三疊寄周參政伯溫鄔僉院本初

夜何長日苦短夜長復寒日不暖深林大薄鷓鴣滿尾頰
魴魚遊纂纂千年古鐵紫氣纏赤帝當之白蛇斷中朝老
臣雙珮蒼憂心鬱紆寢息忘鳳凰在笈驥服箱雪埋石棧
冰河梁夜何長六龍回轡東扶桑

夜何長日苦短夜長復寒日不暖蒼梧九疑雲思遠驚鴻
亂落夫差苑漢家騎尉雙龍蒼酒酣起舞隘八荒疾風吹
沙百草霜玉缸朱火青凝光夜何長帝車高轉天中央
夜何長日苦短夜長復寒日不暖攬槍參旗燭雲罕樹樹
梅花落羌管江南布衣雙鬢蒼歲闌獨立氣慨慷衣冠禮

樂制孔良路迢無由貢明堂夜何長啓明耿耿天東方

梁溪行贈嚴子魯參政

梁溪之陰太湖陽錫麓西下盤羊腸土俗鷙悍民鷓張負
固不貢亂典常明公是時騎飛黃三尺白練揮冰霜西定
汝穎南保抗復來觀兵周處鄉方將增陴深浚隍楚氛一
夜掩斗芒奉頭鼠竄道相望獨有殉節臣姓楊謂文載明
貞外
公退此招散亡昔我仇寇今顏行千百之衆尺寸晷日食
蒲螺草塞劊戰十六月莫禦當誓欲手舉東南綱赤葉楓
落鴻雁翔淮閩共戴吳天蒼金戈煌煌施央央旋師城闕
從鼓簧父老羅拜勸酒漿武惠厚德宜爾昌龍衣封錦來
尚方璽書錫命登巖廊吾君論功邁漢皇屬國負負蘇
中郎事業益大身益強不忝異姓汾淮王

奉陪神保大王宴朱將軍第聞彈白翎雀引有序

梧溪集二

十四

白翎雀燕漠間鳥也初世皇命伶官石德閤製白翎
雀曲及進曰何其未有孤嫠怨悲之音石德閤未之改
而已傳焉戊戌冬淮藩朱將軍宴大王于私第逢忝座
末時夜電霰交下衆賓相次執盞起爲王壽逢亦起王
命左右鼓是曲且語製曲之始俾歌詠之逢謂續事本
實左氏所先故鋪陳興龍大略而不暇他及也

玄陰亘天雪欲作將軍西第夜張幕銅盤蠟光紅照灼四
座傾聽白翎雀雀生烏桓朔部落大朴之氣元磅礴地椒
野稼極廣莫穹廬離離散駝駱黃羊蘆酒雜漣酪鷹狗畋
獵代耕穫太王肇基不城郭青春建寮宵罷柝聖澤滂沛
蔓綿絡風淳俗厖法度約乾端坤倪露冲漠羽毛鱗介並
飛躍庭祠歲饗咽管籥雄雌和鳴莫我樂帝皇赫然太陽
若八表晃蕩氛盡却前驅屈盧從繁弱睢盱嗚咿萬狀錯

遂朝玉帛解組縛大明宮開夾花萼文監武衛盛材略葱
珩穀璧映霜鏐五雲夔龍奏韶濩九苞鳳凰降寥廓德音
威儀匪予度萬姓拭目瞻阿閣軒轅伶倫兩冥冥八十年
來事非昨優鹿襍亂人道削咬哇哀淫頌聲鏢皇孫讓賢
執鼓鐸巾冕雉尾黃金杓穀烝體薦嚼復嚼巴渝舞隊驩
回薄供奉革鞜衣狐貉銀箏載前酒載酌延秋門深魚守
鑰緱山遠度吹笙鶴淮南昔者鷄舐藥千乘之國棄弊躋
方今群雄自開拓拔刀把稍爭刺斫爲臣義同葵與藿將
軍固合鞭先著蓮壺漏沉微露涸枯梢號寒風墮籜百禽
啁噍電霰霏冰花亂點真珠箔箔中呱呱情陡惡供奉若
爾停弦索吁嗟白翎將焉託有客淚下甘丘壑

奉陪杭右丞程禮部以文字文憲僉子貞魯縣丞道
原宴周左丞伯溫館舍時聞河南李平章恢復中原

西湖館舍開新秋三峯倒影紫翠流白馬彫戈駐遠道金
魚玉佩羅林丘二孤五老獨神往八公六逸同天遊時維
小康况大比萬乘少紓東南憂如澠之酒官寺送風生酒
波鱗甲動荔子漿凝赤露香鷺肪炙作黃冰凍歌袖頻熏
婆律膏渴羌解奏參差鳳右丞闕閱霄漢逼諸叟文章臺
閣重罟罟駸駸落日涼菱花遺葉掩冉光驚飛先自有烏
鵲寡宿未必無鴛鴦堯封禹跡煙莽蒼宣髮固短憂心長
側聞汴破濟欲下百姓亦望臨淮王山人厭亂喜莫量笑
整冠帶爲舉觴醉後不登嚴武床

惠孝子行有序

惠孝子名連字子及曾大父疇累遷寶章閣待制常德
知府致仕司農少卿卒翰林池聖夫銘其墓曰金玉其
相表裏無僞槩可見矣子及受學于陸子方先生嘗述

江革郝鑒二贊其贊江有曰兒力甚武毋安勿怖兒身
既豫養不可寔前行弗獲後顧則追我心欽欽卒與盜
即母兒一身安能異塗兒亡母亡將焉用俘其贊郝有
曰民儉于食累累爲瘠推活君子職敬惟德君不苟活
念我二兒骨肉之恩生死共之弗卹爾生胡後而死我
志弗獲全是口體士矜誦之後江陰亂挈母俞及諸甥
姓間關百罹避地吳下逢嘉其言行贈之以詩

吾邦有龍虎村中有宋朝司農惠公之曾孫司農三登魏
科蚤選衛王婿兩作茂宰一出漢朱轡百年雲散金碧氣
衣冠禮樂八九存曾孫自號轆轤生又號蹇連子負材弗
施甘與世相忤未嘗入城見州尊或逢夸毗徒掉臂決去
如林猿日但讀書蓬葦門講畫授弟子愉婉問清溫堂前
植橘堂後樹萱百畝之田五畝園征夫道唱馬汗赤抱膝

方看高鳶騫優哉悠哉樂難諉游兆泥灘歲天狗闕立樊
達官大家驚潰奔水鮪陸虞盡啗吞是時轆轤生悒僂膺
屢捫非不能持挺刃佩猥肫靖鄉國清扎昏母年八袞罔
極恩外甥在侍傍無援誓全古孝義坐使薄俗敦攜扶于
野褰涉于疊慘冒霧露飢採稻藁妻孥臬兀兵火際亦解
委曲奉壺殮天道昭著神佑護卒得命脫蟻聚并蜂屯蹇
連子蓋嘗口撰江革郝鑒二贊累百言文焰炳若星斗繁
聞諸人臬者褫魄示諸人獍者喪魂江郝名與垂軋坤乾
坤蕩蕩敞 帝闈我歌三反烏滿原春風一夜回孤根

題三馬圖

卷開二馬風雲起誰其畫者趙學士渥洼舊感驪龍精禹
門曾浴桃花水並馳定是不契需合與周王八駿俱烏騅
赤兔售非主千金之骨成泥土丈夫懷材莫愁佇

鶴招有序

予友曹炳氏畜雙鶴于皆春園露昕月夕巾烏紗被氅衣與之弄影接武林壑間若超出世瑤物我相忘者數年辛丑秋一日雄嗒然悲鳴驚視之雌折足斃石崎下心甚悼焉爲援華陽故事用玄黃幣瘞所居貞溪傍旣封其土屬逢賦鶴招誌諸石

馬之死也埋弊帷鶴之化也招予辭咏青田芝飲瑤池冠朱衣縞玄裳垂神仙中人受以羈日遨寥天驂鳳螭良苦未若歸來兮風塵軒囂波浪瀾騏鴈羅鷲弓繳悲主家天開林壑姿石砭魚影布參差露昕月夕苔莎滋引吭和鳴舞傲傲關雎之樂不可支胡然孤雄怨此離主亦爲爾意淒其蕙帳燈地香倭遲臨臯道士夢經時不信視此塚纍歎病駝

狂夫東遊乘白驪道路適遇病橐駝紫毛無復好容色肉鞍尚聳雙坡陀南人從來不夢此私怪目擊臨干戈泉渠元自控蕃落天苑畢竟連銀河吳郊楚甸水草淺任重却欲千斤過青袍朝士爲起立茜帽番僧時撫摩熱風吹塵鼻出火積雨成潦瘡生窠牛虻狗蝨苦嘍血末由驅除知奈何頻年出師數百萬熊羆獅豹相奔波豈期獨後死溝壑餘光所及良已多老奚首帕短袴靴手持鞭策涕泗沲憶昔灤京避暑日氣骨礪危從鑿和沉沉金甕夾捫馬裊裊錦帶懸靈鼉服勞輦下藉鬚刷屈跡澤畔甘蹉跎疇能推廣愛烏義沒齒仰飼公田禾

悼炎洲翠

炎洲翠美羽衣穿花掠藻鳴春暉讓王城頭燕分飛淮陰祠下臯相依臯不孝翠先死能言鸚鵡亦已矣吁嗟才卽不吾起

俞丞獲印辭

已亥七月城錢塘四十萬夫翻汗漿九旬塵沙霾日黃幾
夜草上生輝光凌晨夫長賀得印壇紐瓏文玉澤潤官曹
傳看連六郡丞名適同丞有分君不見侯王昔者親佩之
功業弗建終棄遺城今百雉高巍巍呻吟盡化爲歌詩時
來更取左顧龜

烏啄啄言無錫呂志學

烏啄啄行踽踽朝啼暮號反哺無所夔龍在朝虎在邊孝
子之心苦荼苦天高蒼蒼下厚土耳若無聞目無覩虛簷
雨懸燈火青頭白生離夢中聚夢中聚今六霜明年作歌
歌壽昌

張參政手植榆歌有引

榆本高出群木上會兵興山盡童曾孫守中去其半蔽

楊溪集三

十八

以蓂篠然生意秀苑廊廟具固無恙逢一日獲讌樹下
既醉歌之非但歌榆也泄參政忠憤嘉守中孝敬云耳
參政名瑄開海漕征瓜哇有大功于 朝中當廕祖文
龍都水鹽職得七品官隱居讀書尤善畫歌曰

春光堂前蘭坂側孤榆根固如盤石翦截猶全大厦具培
封敢忘前人德至今龍葱陰四合在昔印藏枝百尺海窺
黑水龍伯宮地瞰炎風爪哇國棘槐並去天尺五披拂星
辰長雷雨寶樹方圍錦絲障靈槎忽斷黃姑渚野雉由來
是鳩媒樓船悔不將童女萬程饒道歸帝業半頃苔基系
民土茲辰客筵鷓鴣群麟方公族鶯然文莛邊膾落鑿刀
雪花下酒灑紅缸雲紅地有躡新煙迢遞近臣火餘景低徊
西崦曛興酣墨汁飲一斗弗記書宛羊欣裙

謝沈奐有章素段有引

英樵李人大父烈字秋田明尚書善琴大德間由郡
學錄累遷常州推官所在著美績與乞逢誌其墓而
銘曰有學有文有社有民出際盛明考終厥身子孫
繩繩天厚孔仁維秀之鄙維泖之滬德不稱位何百
十人公位通顯公德雅馴我作銘詩過者惟寅既持
謝素雲官段上存宗師吳全節題封蓋 文宗所賜
分遺大父者也至是逢馳壽女兄張婦復歌詩謝與
黃姑舊織機中段題封進入通明殿石硖平鋪月下冰銀
潢倒瀉天邊練上卿適侍玉皇案賜歸仙界訶雷電法曹
得之三世藏未嘗沉點時爭羨山人近宴采藻亭與也求
撰墓碣銘蠅蚋蟊蝼滿秋思篋笥出此驚爽靈碧桃色染
東極露白虹影貫長庚星吳都璽絲紆皓彩漢苑芸草留
餘馨雲聯朶朶不斷脚恍惚駢飛萬瑤雀方空吹綸何足
數寶蒙火毳宜高閣用裁朝服佩龜魚用製道氅騎鸞鶴
以予貧賤合鯨卷多爾孝敬難為却女兄日誦大洞文十
年著破玄霜裙到家馳壽非矯譽所貴來自 先帝君風
塵盡室幸苟活江海故交能致勤興至援筆報萬一或者
盛事相傳聞

華韡堂

邵棠大父遭兵驅髻稚北行形影孤漣飲肉食調狗馬白
晝快樂夜憂虞曾冰塞磧際草莽行搖飛鳴嗟雪姑遙知
親老兄侍側贖子購弟金不惜卅年日斷苦煙霧一日書
通返鄉國殺雞上冢木已拱對花吹墳春盛昔棠也與棣
永孝思華韡堂開胥浦湄亂離復見田氏樂急難無愧周
公詩今者魯衛政教衰有甚煮豆然其時願保嘉樹長華
滋雪姑並巢連理枝

同曹傳幼巖承平文允宿張會嘉西齋

鄉中三人清似鵠異縣相逢宿茅屋八函金波地流月連
榻翠寒霜入竹一人袖携詩一束同有女兒身亦獨一人
舉室葬魚腹不欲云云淚盈掬長松樹倒哭杜鵑搖搖寸
草春風前春風尚許草報答過江上塚知何年過江上塚
待兵戢登堂互拜親無及亂離孝友莫我期雲霄事業須
汝立東家枇杷花滿林遠山秀列九青簪甕頭濁酒蛆浮
白天外徵書鶴送音

黃道婆祠有序

黃道婆松之烏涇人少淪落厓州元貞間始遇海舶以
歸躬紡木綿花織厓州被自給教他姓婦不少倦未幾
被更烏涇名天下仰食者千餘家及卒鄉長者趙如珪
爲立祠香火庵後兵燬至正壬寅張君守中遷祠于其

祖都水公神道南隙地俾復祀享且徵逢詩傳將來辭曰
前聞黃四娘後稱宋五嫂道婆異流輩不肯厓州老厓州
布被五色縹組霧紉雲粲花草片帆鯨海得風歸千袖烏
涇奪天造天孫漫司巧僅解製牛衣鄒母真乃賢訓兒喻
斷機道婆遺愛在桑梓道婆有志覆赤子荒哉唐玄萬乘
君終覲長衾共昆弟趙翁立祠兵久燬張君慨然繼絕祀
我歌落葉秋聲裏薄功厚饗當愧死

長樂未央玉璽歌爲秦景容揔管賦

赤龍銜日照赤子白蛇橫斃烏騅死東風吹冷咸陽灰長樂
未央連闕起昆吾寶刀截瓊肪陰文小篆雲漢章盤螭作紐
徑二寸歷歲四百傳天王黃星李李明銅爵舞銅仙淚泣如絲
雨盜將神器竟不歸璽亦漂淪頻易主使君購得心良苦君
不見豐城有劍氣上衝米船也貫滄江虹陋歌先附蘇卿鴻

題余道本所藏大父元善號竹所卷有序

元善諱有慶本韶人十二世祖靖仕宋謚曰襄有七世孫哲通判嘉興幼子昇贅華亭朱氏遂占華亭籍又五世至元善讀書慕義粟補司征官既不樂仕以隱德終蚤歲提刑陵陽年瓚雅重之後浙憲使薊丘張雲鵬宣州推官浦城楊載鄉貢進士江陰陸庸四明陳沅咸交焉題誌具在子允中繼歿竹所亦廢爲煙墟露莽道本敦儒行情有不勝言者屬予序卷末且徵詩云

丹霜羽人粹且溫系出慶曆名臣門威然袖出竹所卷前輩留題今具存竹所當時棄官日簌簌猶篲氣深密大中參差鳳叶鳴小宜扶老鳩爲匹嘉魚有羹尊有醕何者是賓何者主一碧寒光谷水潭萬玉秋聲石窓雨喪亂相尋廿載間斬竿採箭不曾閑花羅珍護陀尼錦月朗天空飛

珮還

林石集三

十一

敬題汪氏天馬圖

世皇勃起燕雲開網羅六合蒐英材許公劉公駕萬乘奔走扈從皆龍駮流傳駿骨八十載始見拂郎天馬來天馬來光昭回却追電殿奔雷周曷揭贊漫汗九垓星房元精降恢台鍾毓水德真休哉金溝柳拂青韞毳弄影路寢鳴義臺今或以之靖氛埃三衛七校紛後陪芻豆莫漫肥駑駘

歲星漸高贈王伯純進士

歲星漸高辰星光鎮星不動天中央熒惑退舍太白斂晝芒南斗尚爾雲微茫有美一人被褐裳思君思鄉垂十霜馭娑駘盪氣鬱蒼蒼王屋石室岌相望願楛先驅弧四張歲星輔日照八極還種祭田汾水陽

喜聞整飭臺網詔至是日雷雨因感時事寄何憲幕
幾年十月百蟄驚今年二月雷發聲陽和一氣轉大地忽
忽草木回勾萌白頭偃僂賀新雨惟恐天威咫尺收砮訇
網常錯亂雅道壞誰本王度加脩明何物梟獍徒遂害烏
鳥情謂盜殺越守烏鳥昔日辭桂枝集枳荆超遷栢樹朝
陽鳴啾啾衆黃口寒煦飢飫賴生成颶風翻槽巢啣枯復
經營其雛寢長大不但反哺報所誠梟剗腦獍磔腹嗚呼
烏鳥卒存孝令名我有三尺蒼龍精亦欲爲帝擊不義除
不平况君揚翹舒英如鳳翔九仞如玉價連城君奚不進
臺中評令人思之涕泗橫蘇堤柳青驄轡輕暖紅花霧撲
野鶯黃滕官酒瀉山綠而乃醉踏湖上晴碧雲裔裔東南
征

題紅女二圖

梧溪集三

廿二

春閨寂寂春漏長美人梭度金鴛鴦綠雲蔽地柳陰合紅
露撲簾花氣香遊蜂釀蜜燕將乳準擬卽來裁白苧衣成
稱體復稱心不惜尊前爲歌舞

踈星不流孤月耿銀河散落霜花影翡翠巢虛小閣寒蝦
蟄更斷重門靜沉水微煙戀舊熏停針欲繡錦回文郎作
長安一輪日妾化巫山小朶雲

冥鴻亭詩有引

逢蚤遊金陵臺臣有以茂才異等薦以病辭浙西分憲
繼以晦跡丘園薦不報兵興大府辟佐戎行又以材不
勝任辭客公侯間俟回鄉里而又不可得避地青龍江
上扁亭曰冥鴻非敢自廣姑志所存詩曰

冥冥飛鴻八荒一宇三光並明周視下土下土之人徒弊
罔罟鴻飛冥冥萬里一息與造物遊邈見其跡蒙莊大鵬

祗掩溟北彼啄者烏彼啜者鳧彼甘區區梁藻是圖鳳凰
來儀斯德之符山有灌木木有深枝無枝無巢鴻生連蹄
鴻生連蹄天其汝爲天其汝爲而我無造作亭名鴻是則
是劬惟倣伊何高舉遠蹈

小草軒詩有引

或者病予冥鴻亭因別闢一室名曰小草復賦四言一
首

茁彼小草于山之岑既以流泉蔭以嘉林雪霜相尋雨露
亦深根撥既固綠葉靡歇沆芷澧蘭同是芳烈伊人王孫
斯曾傷別不日遠志奚小名之在山莫尊出山莫卑卑以
自牧君子謙爲天地沍寒朔風孔棘衆就枯落蒼蒼其色
色焉蒼蒼不回厥德春陽潛復勾萌蹶張長養泰和衣被
景光予忍佩之爰樹之堂爰樹之堂爰獻之國忠君敬親

匪頌維則則之維何小心翼翼

送貢泰父尚書整治福建鹽法

雷雨從天起涸鱗吳刀光彩照南閩不惟鹽議張林得况
乃邊籌杜預親穴渡尾閭偏少瘴星分喉舌早移春青煙
亭竈鄰蛟室赤汗丁夫類鬼薪寬減一分存草奏貢聯諸
物上楓宸乘驄使者交游數豺虎何由感化馴

寄柏希顏憲僉

春申山上駐旌旗千騎中間識漢儀

公嘗以常州同知撥兵江陰

嚴警

正當傳箭日清談曾到結繩時車前軾畫熊羆象柱後冠
存獬廡姿杖杜葉青陳宴饗甘棠陰合被歌詩法星一夜
臨丹極爽氣崇朝轉赤墀遂奉綸音司奏劾再持使節寄
安危霜飛五月無朱夏天入三吳有釣絲蒼莽城池餘燕
麥森茫煙水接鳧菑民生轉徙家何在道殣相望命若遺

河內便宜須汲黯宮中直諫憶辛毗
邇聞行部收殊蹟不忘斯文忝故知
七載兵興無限事願趨鈴閣共論思

寄趙仲穆待制

天朝遺老故王孫暇日湖山接討論
萬雉金城猶遶汴六龍雲氣摠歸元
士林冠蓋交中國黃閣絲綸萃一門
緒業遠宗虞秘監風流曾似馬文園
歌殘白紵花圍席書罷烏絲月滿軒
回首風塵重懷想爾家餘澤在乾坤

題息齋李公墨竹有引

公爲婺州路同知時先君獲會于杭
大蒙友重嘗作風晴雨嫩四竹以贈
其嫩竹中一古樹尤蒼潤秀特因指
謂曰此類君英妙中氣幹耳先君每
佩感其言倏已四十餘年矣兵後展
玩爲之惘然敬述四韻

東南文物萃時康先子曾瞻太白光
湖上薰風歌綠水袖中霖雨作蒼筤
零陵目冷湘君淚淇澳詩存衛武章
猶有佳人在空谷天寒愁思碧雲長

寄買靜安靳利安二樞幕

宥府分兵建羽林芙蓉帷幄靜沉沉
風塵地迥陰靈泣霜月城高紫氣臨
一飯不忘當世事百年誰識遠臣心
別來豈但懷思切卧聽關河過鴈音

送省架閣張彥升使淮府慶宴還省兼簡張夢祥樞

掾

江南江北地全歸弧矢星明燧火稀
丞相天寒青建幕使臣春日繡爲衣
殺烝體薦殊恩禮金券丹書煥德輝
好約鄒陽同倚馬梁園醉賦雪花飛

陪宴周伯溫左丞劉君楚侍郎是日席上出汝瓷鴨
爐焚香因賦以簡二公

堂啓芸暉宴相君鷓斑鸚綠闔清芬一絲欲染花間露五
色微生日下雲袖惹氤氲思漢閣詔頒綸綍擬皇墳時劉
吳東吳二月無塵事看劍攤書任酒醺

簡鄔同僉

南粵稱臣陸賈勞漢廷何愛璽書褒恩波遂與三吳閣爽
氣真連北斗高鶯轉羽林交杖杜馬閑沙苑暗蒲萄天心
厭亂民懷德未說關河恃虎牢

送觀可道員外祠南鎮使淮府還京二首

親奉天香祀會稽黃封王檢爛金泥地同南嶽臨朱鳥祠
俯名藩異碧雞三秀乘春沾雨露五雲披曉見端倪好祈
神化資神武縹緲前旌舉白霓

南鎮春回草木青溪毛猶帶舊時馨黃塵荏苒民誰賴黑
海滄茫使有星爲愛寶書探禹穴豈揮清淚向秦庭萬艘

轉餉成山道想見風雲護百靈

送王季德主事祠南鎮還京

千羽春明玉扆間皇華躬遣祀稽山蓬萊雲霧隨封檢敷
落仙曹降珮環宣室舊承前席問樓船今駕海濤還東南
父老憂時切落日扶藜得重攀

送曹德基尚書督海運還京

公府頻年集大勲使傳天語勞憂勤太官酒注芙蓉露上
褚衣開錦繡雲舶趁風清通瀚海招搖光澹靜妖氛還朝
有道扶王室首奏何人策冠軍

吳江第四橋阻風

虹梁雪灘光滅明風著岸脅冰鱗生空郵天晚亂木葉太
湖日寒多鴈聲馬周斗酒足自憫龜蒙扁舟有餘清囊中
青錢不滿百聊買小鮮來就烹

風雨獨坐

先生閉戶坐連朝春雨破塊風鳴條九峰三泖野陰合五
城十樓雲思遙蝸牛戴角上金井蝦虎成群迎白潮桃花
底事苦爛熳幸有尊酒慰無聊

秋感六首

吳門葉落季鷹船朔野霜橫白鴈天三楚樓臺餘夢澤兩
京形勢自甘泉采雲帳幄冷風滿瓊樹花枝壁月圓本是
宣光中興日腐儒長夜泣遺編

紛紛攘攘厭黃巾妖血徒膏草野塵馬化一龍猶王晉楚
存三戶未亡秦颶風天靜浮青海朔漠山高直紫宸莫爲
鬼方勞外伐檠弧箕服最愁人

豆苗瓜蔓未應稀菰米萁絲積漸肥南極有星天半隱東
維無地海全歸連城不換相如璧百結何妨子夏衣回首

梧溪集三

廿六

故山荆棘外幾年空翠鎖煙霏

茗花蕙葉繞林扉獨立蒼寒見紫微夜久長庚隨月上天
清高鳥帶霜飛東南吳會三江入百二秦封六國歸烈士
暮年心未已無言思解白登圍

南越東吳帶楚臯頻年醉眼送飛毛滄洲露白蒹葭滿甲
第秋聲蟋蟀高九日天涯桑落酒三軍城上柘黃袍試觀
漢後詩人作獨覺遺風屬阮陶

鮫魚風息淨江波軋軋機絲響薜蘿華髮道途秋日短曠
懷樓閣暮陰多浮查受宿炎洲翠細草從眠墨沼鷺心自
隱憂身自逸幾時天馬渡滹沱

聞鐘

苜蓿胡桃霜露濃衣冠文物歎塵容皇天老去非無姓衆
水東朝自有宗荆楚舊煩殷奮伐越陀新拜漢官封狂夫

待旦心良苦喜聽寒山半夜鐘

奉謝嚴子魯左丞枉顧

畫省春閒退自公草堂枉駕走鄰童兩川使節瞻嚴武五
郡民心憶竇融其祖武惠公以山簪履百年門客盛詩書
今日野人同高秋擬踐論邊約絳蠟光搖虎帳風

寄倪元鎮

笠澤雨晴煙霧除放船適逢倪隱居黃河泰華意氣若金
薤琳琅書畫如露浮箬葉熟春酒水落桃花炊鱖魚莫嫌
忘形禮法外難得合并憂患餘

題包旂彥招管溪別業

夷吾溪上草堂成江月浦風相與清蒼苔白石琅玕長積
水踈簾翡翠鳴鮫女賣綃新識主家人舉按笑呼卿膝前
况有兒如玉收拾餘金鑄短檠

送葛玄素住持普福宮

海虞山色秀屏開紫氣丹光湧玉臺父老舊瞻雙鳳下神
仙今跨五羊來綠林烽火沉虛壁蔓草春風轉上台聞有
子規栖未穩長松宜傍井邊栽

簡林叔大都事

省闈無事日盤桓猶是中朝供奉官半臂縹綾披月下三
神珠闕望雲端蒞蘿草變鯨波落首蒼花開鴈塞寒因話
朔南聲教在一回相對客懷寬

贈呂醫師有後序

橘花開處杏陰青百草吹香覺地靈貧士願留賒藥券故
人思續衛生經玄霜玉臼晴猶濕華月丹房夜不扃張叙
苦吟仍病肺擬和熊膽護脩齡

叙字彥倫吾鄉黃田人也家甚貧日往返十里從予讀

尚書鄉之大夫士咸愛其才志篤敏將進乎學予獨懼其神氣不充久而殆病也未幾果病予深憂之遂用宋清故事具券即醫師吕如心氏如心曰吾道本乎施濟孰不願賢而利達富而壽考幸生而賢賢而苦貧貧而苦病病而不能藥我是何心哉遂反其券命日服藥一累至數十累而愈愈之日予詩之而復序之蓋所以旌如心之德而為彥倫慶也

訓夏仲實府判包德文提學德立縣尹

春日頻承鄉里書鴻山別業問何如風烟不異王官谷馬幣曾過處士廬豈避浮名終遠去祇緣多難數移居使還為報諸先德黃獨苗長二尺餘

簡趙茂叔山長

梧溪集三

廿八

木槿花開落日邊感時興歎撫遺編何蕃仁勇真難及江揔才名不大傳叩笮舊通秦道路柴桑猶屬晉山川嗟予鞅掌風塵世頭白終師魯仲連

簡張光弼員外

瘦馬羸童退食遲倒衣相見即相知風流不減張京兆心跡無慚柳士師枕上燕鶯鳴曙日道傍花絮冒游絲天機人事觀都遍笑約西山賸采芝

簡陳韋美員外

幕府深嚴午漏遲簾文簾影碧參差揔傳白馬陳從事每念青袍杜拾遺大地風塵憂未解扁舟江海去無期涼天鴈叫芙蓉發許奏軍中鼓吹辭

陪淮南僚友汎舟吳江城下

波伏魚龍夜不驚菱花千頃湛虛明吳儂似恠青絲馬漢

月重臨白帝城世說竇融功第一獨憐阮籍醉平生樓船
簫鼓中流發喜及東南早罷兵

送何憲幕北上

千里妖氛百戰空送君先謁建章宮吳牛漫喘雲間月天
馬終依冀北風仙掌向秋清露滿銀潢疏派大河通
至尊宵旰仍多闕臺諫何由得數公

送毛弘道赴內察掾兼簡任子羽憲幕

越王臺端驄馬青憲郎一鶚上青冥二儀開闔車書正中
夏清寧草木醒都邑載瞻春有象東南私喜客無星鄉人
解后詢消息十載鵲啼少脊令

憶程禮部宇文憲僉二先輩

憶陪清宴嫩涼天南北雙峰几杖前文行並優者舊傳笑
談曾及汶陽田高風鴻鵠歸三島明月蘭苕在一川私歎
衣冠就淪落東南誰頌中興年

送薛鶴齋真人代祀天妃還京

蓬萊宮裏上卿班代祀天妃隔歲還日遶五文皆御氣海
浮一髮是成山風霆夜護龍鸞節雲霧朝披玉雪顏聖渥
既隆玄化盛轉輸應盡入秦關

龍江齋居簡許怡軒江城南王至訥瞿間野王晚翠
投間田野罷從軍孟夏齋居樂可云銅滴水寒蘭葉露細
簾風颺柳花雲門生載酒還多酌道士籠鴛或一群近種
黃精三百本秋高分寄許徵君

鶯粟花開蠶豆肥梓梧陰合乳禽飛一庭生意何曾歇四
月青春不見歸只爲身閑家有此尚論心壯事多違鄰翁
也道山人樂顛倒烏巾鶴氅衣

題松隱庵

第二名泉瀉玉虹九龍分遶梵王宮雨餘清氣來天上風
定鳴聲落座中松葉晝昏山欲合藤花雪白徑微通老僧
異我君親念一卷琅函答太空

留別陸芳潤張孟膚田仲耘王孟翼

楓葉殷紅枳實肥蘋風蕭颯芰荷衣自甘許汜求田去不
擬劉蕡下第歸日落大荒猿夜哭天含積水鶴雲飛諸君
有待乘槎便直犯星河織女機

故湖口縣主簿蔡君挽詞有序

君名德榮字景華揚州人也至正十五年從淮南省臣
出征累勞授將仕佐郎湖口縣主簿明年春三月揚失
守將扈鎮南王北奔淮兵執之見兵將命以官力辭自
羈縻於吳卒君之子平江錄判徹友於予一日泣拜曰
徹先君家素饒好濟賢士之貧者卒不望報好飲酒客
或沉湎廢禮亦不之過鄉里用是稱長者然不幸遭亂
死尚幸節不失徹陷草澤得生還忝斗升祿爲老母養
實先君遺靈是祐先君久爵_二地下惟先生垂一言而
顯白於世則幽潛之榮徹之至願也予嘉徹孝乃叙而
詩之詩曰

不識中郎裔咸稱長者風淥尊容潦倒金帛濟途窮楊柳
平山外瓊花后土中亂離霑一命慷慨抱孤忠驥子飄零
隔荆釵患難同劍虹衝夜斗書帛斷春鴻命也貧甘節天
其夢告終山人追作誄應感九泉通

題僧教東傳先世姚氏遺事有序

嘉定姚舜元字景瑞少拳勇以武功授宋保義郎平江
府東南副將守吳淞德祐改元爲元至元十二年其冬
王師下平江君邑大族民樂肺附有弟舜賓子應龍興

龍應龍登咸淳間第太學上舍相感奮曰國家厚澤在
人大本未去收合散亡應內援外事可濟也未幾王師
偏將東徇莫敢犯境十二月十六日會天霧四塞襲兵
卒至咸死之上舍子復明易侍讀學士北庭貫公最友
善嘗叙其詩集今靈隱書記僧祖教復之中子於君爲
曾孫謂予以遺烈告予謂其先爲臣能忠死爲弟能義
死爲子能孝死忠義孝萃于一門而可使之無傳乎教
泣載拜曰願有傳也乃述其槩繫以詩詩曰
賈男收餘燼驚心壁大兵虻蚍曾少援葵藿本同誠尺伍
開符籍孤虛識陳營青烽寒入望銅斗夜傳聲朔吹刀如
割南天蓋未傾小臣甘效死同氣忍偷生江洵濤沙合星
流霧瘴橫一門忠孝行春草尚含情

題邵氏家譜有引

梧溪集三

世

邵自康公至東陵侯平凡五十世又八世至東漢左中
郎駙召始加邑又四十世至唐名旺者爲濛源府君從
睦州遷居淳安之諫村支派最蕃衍宋有吳越邵子孫
以先世唐尚書左僕射易直刺史若虔州思括滑州行
封歙州裕期湖州叶丹徒尉符并州刺史強右武衛兵
曹肅會稽令顯濮州刺史儒官誥詣有司帖授衣冠戶
時開寶八年又十三世名桂子爲宋處州教授有別業
在華亭處州孫亨貞出示族譜逢敬題是詩

宋日衣冠戶唐朝德澤門變遷支派異貧賤典刑存爪盛
青雲合棠高玉露繁蜜房蜂祝子香壘燕生孫誥護先王
勅車留太守轡一家天與貴百世海涵恩歲有團樂樂春
多語笑溫齒非論犬馬祭每課羔豚服任總麻盡心期禮
義敦國風詩在魯山脉氣朝崑伊呂曾爲匹朱陳近結昏

公侯必復始尚憶諫名村

和朱理問見貽韻

風雨懷賢夕東南厭亂時湖翻波自洶天聳聽還卑倦塌
鷹鷂翼紛張蜃鱷頤終童孺早棄直使斧先持晁錯兵三
策陳平計六竒金啣龍口劍青絡馬頭絲草接春程閣花
穿午漏遲明珠還甃社白兔獲符離方物通諸貢民生免
百罹偶存丘壑想遂保棟梁姿寵利從爭效才名任詆嗤
由來五色賦甘後兩錢錐跡異商歌綺功收蜀將維武經
閑虎略恩帶卧犀毗此日猗玕洞明年赤玉墀五雲瞻繚
繞湛露挹華滋車笠盟誰忘煙霞疾我私紫垣星北極茅
屋地西枝嗜酒全元亮吹竽退子綦鄉山瞰蓬海黃髮候
安期

謝嚴院使枉顧旅次

香溪集三

廿二

漢節驅前隊吳駢夾兩轅肯來詢白屋迥異過高軒葛亮
煩三顧駿明契一言君王憂社稷臣子瘁藩垣碣石深淪
海黃河不改源日知陳俎豆夜想屬橐鞬客忝游從數家
承禮義敦風流賢謝傅尊大鄙公孫鈴響花連閣舟橫柳
映門春來足清暇誰與看雲騫

送兵部使賈彥彬北還二首有引

彥彬名文質晉寧人嘗以都水監奏差押兵部馬赴安
豐還次全椒遇亂幸不死側身草野凡數年始獲奔浙
省省臣嘉其鋪馬 聖旨在上之中書逢勞以詩云

天上小行人全椒犯虜塵九年君入望萬死鬼爲鄰星轉
蒼龍近船歸綵鷁新殊恩酬苦節悲喜集楓宸

使臣全璧返行色澹婁臯毛落蘇卿節緜寒范叔袍紫桑
空月冷桐柏尚烽高有問征東策天兵勿自塵

哭沈先生有序

先生諱蒙字伯亨西秦人從子方陸公學既侍父官於
潛因遊天目山作記累千言復唱古詩百韻一時坐客
咸檢衽謂才足追配海粟馮公之賦時年十九耳平生
明春秋尚春淹貫子史百氏學氣節蹕厲累應試不中
拓落江淮間二十年日寄傲於酒貴富人莫能下後江
陰亂偕友趙乾宗往依馬洲鉅室未幾亂兵執先生索
鉅室主卒不言遂與趙遇害哀哉逢避地暇命兒掖錄
先君庫使行狀妣李氏傳感先生大手筆足以發揮潛
德嗟先生不幸死而言行之懿則非逢所能述也姑哭
以詩

三楚皆兵侵中洲自樂郊不虞烏啄屋竟作燕焚巢氣節
摧強虜文章哭故交家山限天塹瞻拜奠蘭肴

枯澤集

廿三

寄汪用敬劉彥肅二憲郎

太尉新開府諸曹舊直臺節毛通萬乘旗羽拂三台路遶
青州入烽從赤壁來英雄滿麾下參贊屬奇才

題堅上人石林圖

石林禪隱地萬木擁巖礫風露蒼寒濶雲霞玉氣高採花
猿效供噲果鹿忘勞亦有清吟客時同步紫螯

何禮部國器留晚酌得飛字

晚酌尚書第杯光照客衣錦戩魚並躍銀燭鳳交飛踈樹
風涼進幽蘭露氣微喜聞謙退語不減在郊扉

贈啜霑進士

分攜十六載兵後見殊鄉道在衣從短時來面覺方苑花
鶯轉日邊草鴈啼霜出處關文運燈前且盡觴

贈王菊隣

白露秋香外君家若箇邊神交陶靖節地主傅延年採對
蒲城酒餐同橘井泉宗人有王翰行咏卜鄰篇

寄邁善卿憲幕時揔戎越中

憶同沙進士訪我大江濱座酌烏程酒篇連賈董文瓊林
依日月禹穴會風雲極目窮南紀書生將一軍

貢玩齋尚書邀往西山觀程以文員外葬地值雨作
旌繁澹秋色衣沾踈雨涼身忘侍從貴義急故人喪地隱
牛眠穴山回鳳舞岡河南先墓表百世耿相望

哭信州揔管靳公二首有引

公諱仁字利安弟二人義字處宜太平路揔管守節死
贈河南省左丞智字士達浙憲知事卒並有材德

世重憐才義人趨讓廕風鯉庭承孝友鶴髮佩公忠日月
迂花萼嵩邱隔桂叢一門三采鳳無愧薛河東

令弟皆知已巖廊兩薦名乾坤離亂日金石死生情牛渚
孤忠耿烏臺爽氣平高天鴻鴈合好在洛陽城

題虎樹亭有引

趙宋聰禪師住華亭余山時有二虎噬人師降伏之命
名曰大青小青師卒席亦死弟子瘞之塔傍踰年生銀
杏樹二今尚存主僧隱公闢亭樹間扁曰席樹徵逢題
是詩

舟泊東西客詩招大小青山高白月墮草偃黑風腥植物
鍾英爽精藍被寵靈涼陰慎翦伐留護石函經

澗湖舟中懷謝府倅履庵

月破山河影天垂霧露陰西風寒不競東井夜空臨獨擢
滄波闊踈燈落木深無官卹民隱思爾細論心

寄衡良佐御史

昔忝左丞客屢陪賢佐遊論兵雪驛夜觀稼石門秋大器
已驄馬不才還弊裘天風動書劍思載剡溪舟

寄南臺經歷察士安

傾蓋庾冰宅賡歌黃歇山鹿麋任野性鷓鷯老朝班窈石
亂雲裏研池脩竹間遙知草奏暇游馬夜深還

登吳山三茅觀訪貢尚書留宿口號

湖光湧殿壁石黛長巖根散髮誰騎虎披衣客聽猿天經
南海闊斗輔北辰尊竟夕風生座溥溥竹露繁

同楊鐵厓提學雨坐章園

野闊大溪橫苔梁翠碧明二人終日坐微雨四簷聲爐裏
庭花氣未含水木清何當放樓艦同上錦官城

謝王季野馬東臯二省幕枉顧

白馬搖雙轡青童扣獨扉汗揮雲火日心在薜蘿衣本爲

吹笙過無因待鶴歸秋齋帶琳闕清坐莫相違

寄兀顏子忠廉使

詔開神策府星麗太微垣霜候深秋正湖波舊日翻鷹蒼
拳玉立驥伏志雲騫亦有王通疏三年望帝閣

贈章彰德吉父

致仕章彰德雲間負重名義田春雉雒書閣夜燈明諸舊
依妻子孤臣謂楊乘員外寄死生黃金日圍帶躬導板輿行

寄魯道原提學

謝病儒臺客從來結友生左官辭板授弟子賴經明孔座
尊常綠雷津劍合鳴嘉魚厭客邸只少各歸畊

簡黃心之同知

夜宿松陵館湖開一鏡星蛟潭積水黑蟹屋亂燈青漂泊
身垂老踈慵酒復醒慙君在官守憑軾慰零丁

題謝疊山先生所撰高士薛君墓誌銘後有序

君名伯英字俊夫號秋潭貴溪儒家子也學老子於龍
虎山理宗朝以術排潮復驅旱魃咸有徵召見復古殿
甚異之事父母孝義於兄弟上清宮有古琴善琴者以
爲東南奇寶流落塵人家四十年君常曰此山中舊物
人所共珍何忍使同俗物乎謀厥弟空囊中得錢千緡
贖歸與其徒共之有弟爲游士累貪吏因羅織之勢窮
矣君盡力以救不足則率兄弟爲士農者傾常產以脫
急難謝先生曰以君志誼持爲天下用豈肯聽祖宗神
州赤縣淪沒百三十年而不歸乎豈肯視生靈怨愁國
步顛危而不一策拯救乎韓退之見當世無偉才朝
廷無忠臣義士遂疑忠信材德之民迷溺於佛老之教
而不一得廖道士驚喜如見異人吾嘗恨不見廖道
士者矣惜吾生同郡而不及與之言也其推重若此君
咸淳六年卒族曾孫毅夫以詩請敬題四韻

寄黃仲瑱山長

三度貢春官中年樂考槃韋編百氏易緇布古時冠雲漢
星踈曉江淮日落寒高堂枕泖曲獨遺子孫安

題張明叙安然堂

嘉遁張君子安然扁野堂一身離寵辱六鑿罷搶攘對酒
鶯來下看書筍過長青山忘賓主白髮任行藏

避地養疾寄謝吳桂隱張清遠黃璟和張柳莊

落日愁無那徂冬病不斟杖藜踈木下藥火閉門深琴歇
陽春曲書親夜氣箴朋游數餽問益見子輿心

題謝縣丞季初可竹軒

明府深居竹淇川不啻過虛心待物久素節守官多雪影
魚竿瘦春聲鳳律和更栽花滿縣相映澱湖波

題余寅景晨雨濡亭

孝子亭何處斡山蒼翠陰簷花中夜滴墓木百年心貯蠶
通冥遠神龍澤物深焚香肅冠珮聲歎有遺音

過姚孟麟元鱧佘山溪堂

堂依佘北澗泥滓淨毫纖空翠潤侵幌水衣光動簾燕毛
情每洽薦鮪味時兼一酌佳兄弟家興讓與廉

過馬天章水村居

嘉興馬錄判歸築水村居士銜長腰米尊羹巨口魚青衫
沾露薄華髮向秋踈尚爾丹心壯無時去玉除

題謝頤素一勻軒

梧溪集三

廿七

一勻源頭水當軒晝夜渟鑒心塵弗昧育德藻同馨玉匣
開天象冰壺泄地靈山人研池渴分得小龍腥

題唐子雄照磨博雅堂秦景容郎中爲序

博雅堂高闕君應慕古初交龍座右鼎科斗架頭書性朴
時多忤居深跡自踈少游大手筆不啻重瓊琚

登朱聽孟律海月樓

樓居延海月人訝小冰壺平地流銀漢中天倒白榆兔蟾
秋並浴蚌鮎夜相濡咫尺驪龍睡無心摘頷珠

哭成元章

諱廷珪與丁仲容先後日生李坦之張仲舉咸至交好有詩倡和

淮海成遺逸詩吟字字精每稱盧八米堪敵李長城虹日
銜雲赤霜風落木清計聞張祭酒涕淚想沾纓

名後登龍李生同化鶴丁看花頻后土累茗或中濡世事
餘黃石朋游半列星何人謚貞曜永爲賁泉扃

近故二首

近故儒林老於予起嘆嗟清秋書柿葉落日賦桃花碑碣
留吳滿雲山向越賒多情楚宮月未照未栖鴉
近故惟揚老威儀本漢官才高三禮賦心折一泥丸露氣
金盤濕簫聲碧落寒空餘茂苑樹鵲血幾時乾

鄰飲

蠟炬遶紅鸞盆花玉露溥無家憎月色多難薄春寒毛穎
時旌鬼黃金少鑄官西鄰濁酒熟得罄一回歡

趙待制木石爲張怡雲題

湖舫雪飛鷗湖堂山倒流雷風収 雨木石寫高秋對酒
忘新樂披圖念昔遊王孫久長邁芳草思油油

武林道中

風雨孤舟客乾坤一葉身久憂龍戰野翻作鳥依人山赭

梧溪集三

廿八

嵐光薄田菜水色新忍言疇昔夢歌舞送鶯辰

舟中值雨寄廉清忠許澄江二山長

野艇人淹泊湖天雨往來草牽春緒亂花倚暮寒開積水
鮫鳴杼長堤蟻漬臺襄王限楚澤宋玉漫多才

題鍾氏亭子

愛爾亭如舫繁陰滿四楹月高聞露滴春遠惜鶯聲煙直
香逾細杯深酒益清翻嫌衆綠暗爭賞一花明

寄傅文博御史兼簡丁彥誠知事

微疾感霜露客居驚歲寒遙紆長者轍還戴惠文冠世亂
窮途早家貧一飯難春來幸勿藥思與奏猗蘭

寄蘇上海彥祥兼簡李教諭

楓盡荻花乾蒼茫海國蟠莫窮三尺法須貸一分寬集吏
朝鳴鼓憂時夜整冠高情繼蘇頌應念廣文寒

懷楊彥常編脩

落月夢千里故人天一隅名高藝文傳才大廟堂謨申白
舊賓楚鄒枚終去吳河冰泮新綠應已賦三都

寄溥鰲海掾郎兼簡宗燈二上人

省郎前進士裔出素封家畎畝寸心赤風塵雙鬢華玉衡
低虎觀金柳亘龍沙寺壁詩千首煩僧覆碧紗

簡林仲寔主簿

休官林主簿數數問幽居野飯狼牙菜山醪鹿角魚刀圭
知有術光範喜無書想見徵龐統花迎別駕車

簡陳野航主簿

畫舫古琴書青袍雙珮琚詩題梁紇廟恩注白公渠訪舊
論心密傷時任法踈人傳飲淞水不食四腮魚

聞畿甸消息

白草生畿甸黃沙走塞庭直憂星入斗兼畏雨霖鈴殿閣
餘龍氣未冠自鵠形吳粳斷供餉隴麥向人青

辛丑四月朔西日下黑氣相盪久之口號八句

躍馬群雄日歸鴉薄暮時正傷雙目短又見太陽虧野老
相扶拜天王豈宴私金戈望南國應似魯陽麾

春寒

天水新歸蜀齊城舊入燕可憐羈旅士重越亂離年日晏
還晞髮春寒懶著綿無情野桃李風雨亦成妍

題歲寒橋有引

至正壬辰七月十日徽寇犯杭時樊時中執敬爲浙省
參政亟禦于橋遂死之

大參身死歲寒橋忠血長流憤未消一片王孫煙草色岳
墳松柏共蕭蕭

奉題清碧杜隱君爲先子隸古西銘太極圖說後
武夷仙擢泊溪雲曾寫西銘太極文參政謂周公留題猶
六載草堂新對一爐熏

奉題文丞相小像贊附

中齋鄧公光薦贊曰目煌煌兮踈星曉寒氣英英兮晴
雷殷山頭碎柱兮壁完血化碧兮心丹嗚呼孰謂斯人
不在世間虛谷方公回孫贊曰始見可畏再見可愧三
見出涕噫千萬世

何代忠臣事二君先生一死重斯文後來故國多登相傳
說孤星燭暮雲

奉題曹先生柏窻卷有序

先生諱思順字彥信柏窻其號也厥先自昇徙梅李宋
初復徙江陰五世至文雅生碩咸隱君教授碩以子璉

梧溪集三

四

湖南提刑貴贈金紫後有三昆弟聯登進士者故所居
坊名藁桂先生蓋金紫十四世孫嶷重謹言明易浙憲
呂公思誠薦授儒學官再除以大母酈春秋高遂弗仕
至正乙未遭亂病卒有遺藁十卷子博美文行女淑靖
蚤寡守節淑靖淑寧並不辱死逢僭嘗銘墓曰吳季子
邑大江隅曰大姓族曹莫踰歷二十世家守儒公兩典
教光前模桂百斯葉一葉敷中復瘁只吾何吁天其好
還昌爾孥至是復題是卷云詩曰
叢桂坊西古柏青韻含風露雜琴經先生久作芙蓉主喜
有餘陰覆鯉庭

春霜

天家青女試春霜細藻微波凍野塘茅屋布衾誰道薄隄
囂宮合瓦鴛鴦

和惠子及雨中五首

草閣寒多帶水陰
雨餘江鳥自浮沉
鬢毛漸比吳絲白
春色都隨杜酒深

桃花昨夜愁盡發
燕子今春疑不來
雪衣鸚鵡亦可怪
錯喚主人非一回

今春又值甲子雨
十年之前人日晴
東風誰家作花信
白水滿堦如雪明

鶉鴝喚雲雲不開
紫茵生榻蝸行苔
五花詰身酒市賣
一葉野舟天際回

小范宅前花霧開
正要惠子白驢來
春波鴨綠酒一色
飲酒對花須百杯

和趙女謝世韻 有序

南臺掾趙晉女生而秀慧多病愛讀列仙傳母怪問曰

林溪集卷三

四十一

列仙傳何如列女傳女笑答曰某有夙習乃爾或聞人
請婚輒謂母曰凡求婦爲養舅姑承祭續後也不以實
辭而聽其納采脫物故其失三者之望必母氏是尤遂
金闕十二玲瓏白玉樓明朝了却人間夢獨跨青鸞自
在遊端坐至曙而逝文學書院山長樊君浚傳其事屬
予與許掠各和一首掠曰大地風塵連水國九天月露
滿瓊樓青鸞背穩星河近先從西池阿母遊浚字文淵
廣信人掠字友常吾鄉佳子弟也予曰

珠樹三花開福地
采雲五鳳敞粧樓
無情莫伴天孫織
有樂須同婺女遊

題趙文敏馬

蕭蕭首着起秋風
隱隱黃雲沒塞鴻
可愛南朝趙公子
尚

臨先世玉花驄

題陳希夷睡圖

華山松樹倚雲臺
五季龍爭眼倦開
未必先天參妙理
墜驢一笑却歸來

題李唐江山煙雨圖

煙雨樓臺晡靄間
畫圖渾是浙江山
中原版蕩誰回首
只有春隨北雁還

齋居四首

野堂人遠晝深沉
風裊爐香度玉琴
黃耳卧當蕉葉下
畫眉啼傍石榴陰
坡石幽花駐夕曛
研池飛絮弄春雲
故人書拆南窓下
多是稱呼作隱君

梅溪集三

四二

有酒不煩人問字
無金仍望子收書
如何話得幽居好
一箇鶯啼春雨餘

花嶼生寒雙袖露
酒波動影滿瓢星
女兄強健身閑樂
稚子時時過草庭

邵景誼席上醉題

五茸三泖水雲寬
幾處春移草亦寒
惟有種瓜門業盛
牡丹花到子孫看

夜宿岳氏醉題

霧重魚生翼
山昏虎變文
列星如品字
知是羽林軍
題瞿睿夫鈎勒竹

我嘗宴龍君
醉躡白鳳尾
都將蒼梧雲
零亂瀟湘水

題猿圖

霜清月白時
冷掛長松枝
想愛玉澗水
弄影照須眉

趙待制畫爲邵臺掾題有序

丁酉仲夏予自梁鴻山復辟地青龍鎮遇風恬月霽或
木脫水落輒命童孥小舟延緣黃浦淞泖間無以形容
身開心樂也嘗擬權歌曰月明濯足龍江口木落題名
鳳山首三泖天低一幅巾五茸露瀉雙餅酒道逢船子
歌載過季鷹拍手龜蒙和澗湖慘澹神姑迎魚波鱗鱗
鏡光破又曰靈胥潮落龍華步少女風生鰕子渡蒼葭
兩岸船獨搖紅葉千村塔微露前峰四五先我揖龜魚
踴躍蛟起立銀河滄海氣同流頭戴青天如弱笠及已
亥秋遊杭戶部貢公泰甫以予久屏城府之跡夙徂泉
石之好乃一日邀集賢趙公仲穆宴予湖山真館于時
境延虛清座挹勝賞偶舉是歌趙曰斯氣象殆非有聲
畫而已然畫當屬之我也衆相顧大笑未幾圖成予詩
謝曰魏國佳公子煙波小釣徒偶同觴詠樂得寫權歌

格溪集三

四十三

圖林木巢春燕葦祠嘯火狐終焉隨蹈海不敢嘆乘桴
自後有以蕭山令薦予者予還寓隱既邊報急聞趙亦
歸雪上以卒今年甲辰彥文解后吳江示趙所畫綽有
權歌景予語以此彥文俾歷叙詩左云

書宣妙春雨田上人余山禪房二首

鐘鳴林采曙衣冷山氣夕時復煑茶香煙籠半簷白
松風琴虛弦雲磴屐落齒坐來木榻穿爐香一盃水
吳中步雲洲道士事老寡女兄甚至爲贈絕句
看經得錢幣置酒奉女兄擬衣紫霞帔同上青雲城

題珉西崑開士冬筍軒

雪中筍斑斑如兒在襁抱兒參玉版師親年如竹老

馬頭曲有引

馬頭者大都名姬也始爲黃禪太子寵黃禪伏誅没入以賜太平王王薨子唐其勢留之唐其勢被伯顏太師殺復没賜字哥字哥國語力士也柯鑒書九思嘗賦曲淮東憲史張彛言之予擬小詩六章適外甥俞董至因命董與兒掖攝足其意亦止乎禮義云耳

衛風柰無倫春秋濫不止鄙哉金谷園綠珠乃肯死和戎漢明妃亡吳越西子鬼妾賜元臣孰受盧弓矢前時楚襄夢今夕伶玄妾瓊斷藍橋漿紅流御溝葉香熏舊繡衣鏡改新粧面只有夏姬情不解湘妃怨珊瑚近没官鸚鵡亦更主一種拒霜花年年自江浦君仁邁曹瞞妾賤慙蔡琰築臺有羸金蘆笳不長掩春星復在隅秋水仍含盼本非東家蝶失奠西階雁花飛漢宮燕天遠秦臺鳳載事駢脅郎願同白頭夢

梧溪集卷三

四十四

鑿刀剗燔羊官甕瓦瀉桐馬更衣蘭房中弔影銀燈下掖王門激楚曲相府西涼調愁中換宮商郎母看妾笑蜥蜴飼丹砂鴛鴦置金鎖東風獨何情楊花起還墮攝妾身汨泥塗妾心暴天日後來未亡人願似孤兒恤萱圖爲李愔題于茂清軒中

暄風宜男花涼日忘憂草一種兩含情親容夢中老



